

Evangelii tenor Lucas 15,1-32



Da tuttas sorts publicans e pucconts vegnevan tier Jesus per tedlar el. Cheu murmigna-van ils farisès e mussaders dalla lescha e schevan: Quel retscheiva ils pucconts e maglia cun els! Sinquei ha el raquintau ad els sequenta semeglia:

Tgi da vus che ha tschien nuorsas e piarda ina da quellas, lai buca las navontanov el desiart e va suenter quella ch'el ha piars, tochen ch'el anfla ella? E cura ch'el ha anflau ella, aulza el ella plein legria sin sia schuiala ed arrivaus a casa cloma el ensemen ses amitgs e vischins e di ad els: Selegrei cun mei, pertgei jeu hai puspei anflau mia nuorsa ch'era ida a piarder! Jeu ditgel a vus: Aschia vegn ad esser en tschiel pli bia legria pervia d'in sulet puccont che seconverta che pervia da navontanov gests che han buca basegns da seconverter.

Ni tgei dunna che ha diesch muneidas e piarda ina da quellas, envida buc ina cazzola e scua la casa ed enquera cun premura, tochen ch'ella anfla? E cura ch'ella ha anflau, cloma ella sias amitgas e vischinas e di: Selegrei cun mei, pertgei jeu hai anflau la muneida che jeu vevel piars! Jeu ditgel a vus: Aschia vegn ad esser legria tier ils aunghels da Diu pervia d'in sulet puccont che seconverta.

Lu ha el detg: In um veva dus fegls. Il giuven dad els ha detg al bab: Bab, dai la part facultad che tucca a mi. Ed il bab ha partiu denter els il

possess. Paucs dis sissu ha il feigl giuven priu siu fatg, ei serendus en ina tiara lontana ed ha sfarlatau leu tut cun menar ina veta lischada.

Suenter ch'el ha giu fatg ir tut, ha ei dau in grond fomaz en lezza tiara, ed el ha entschiet a sentir la miseria. El ei ius e sepladius tier in vischin da quella tiara. Quel ha tarmess el o sin sia pastira a pertgirar ils pors. El vess bugen empleniu siu venter cun las bliuschas ch'ils pors magliavan, mo negin deva ellas ad el. Lu eis el ius en sesez ed ha detg: Cons luvriers ch'ei en schurnada tier miu bab han paun en abundonza, e jeu sun cheu e mierel dalla fom! Jeu vi semetter sin via e turnar tier miu bab e dir ad el: Bab, jeu hai fatg puccau encunter il tschiel ed encunter tei; jeu meretel buca pli da senumnar tiu feigl, tegn mei per in da tes luvriers da schurnada. Ed el ei semess sin via per turnar tier siu bab.

El fuva aunc lunsch naven, che siu bab ha cattau ad agur el ed ei vegnius tschaffaus da compassiun. El ei currius encunter ad el, ha embratschau e bitschau el. Il feigl ha detg al bab: Bab, jeu hai fatg puccau encunter il tschiel ed encunter tei; jeu meretel buca pli da senumnar tiu feigl. Mo il bab ha detg a ses fumegls: Spert, vegni cun il meglier vestgiu e targei en ad el, dei in ani per siu maun e calziers per ses peis! Menei neutier il vadi engarschau e mazzei el, e lu lein nus

magliar e far fiasta, pertgei quest miu feigl fuva morts e viva puspei, el era piars ed ei puspei anflaus! Ed els han entschiet a far fiasta.

Siu feigl pli vegl fuva sil funs. Cura ch'el ei returnaus e vegnius damaneivel dalla casa, ha el udiu a sunar e saltar. El ha clamau neutier in dils survients e dumandau, tgei che quei munti. Quel ha detg ad el: Tiu frar ei turnaus a casa, e tiu bab ha fatg mazzar il vadi engarschau, perquei ch'el ha survegniu anavos siu feigl sauns e salv.

²⁶Cheu eis el vegnius vilaus ed ha vuliu saver nuot dad ir en casa. Mo siu bab ei vegnius ord casa ed ha supplicau el d'entrar. Mo el ha rispundiu a siu bab: Mira, tons onns survesch'jeu gia a ti, e mai hai jeu surpassau in da tes camonds, e tonaton has ti mai dau a mi gnanc in ansiel per che jeu sappi far fiasta cun mes amitgs. Mo ussa che quest tiu feigl ei turnaus a casa, suenter ch'el ha sfarlatau tia rauba cun pitaunas, fas ti mazzar per el il vadi engarschau!

Ed il bab ha detg ad el: Miu affon, ti eis adina cun mei, e tut quei ch'ei miu ei era tiu. Mo ussa s'auda ei da far fiasta e selegrar, pertgei quest tiu frar fuva morts e viva puspei, el era piars ed ei puspei anflaus.